

113年花蓮縣吉安鄉語文競賽客家語朗讀文章國中學生組（四縣腔）

編號 1 號

【竹蔗下个蟬仔】羅紫云原作

屋脣該墩竹蔗仔，種幾下年地當大墩，斬忒又會過綻筍，繼續煞猛生到青禾禾仔，該竹蔗目長水多，清甜好食。

逐年大體到五月開始，日日到臨晝仔，竹蔗墩就會有一群著等青衫，當靚當得人惜个蟬仔。這兜頭大尾尖、翼又長个草蟬，細細仔像手指尾恁大隻定定，黏在這長長青色个竹蔗葉下，佢兜盡力粘在該啦歌哩曲，鬧熱煎煎。佢兜總係恁仔唱：「揸揸揸兒¹——揸揸揸兒——」清亮个歌聲，一直到下晝兩點零正會煞棚，毋識喊瘡。

草蟬仔下班過後，媠牯蟬²跔等上棚，佢黏在竹蔗仔脣該頭榮榮个苦棟樹頂，算係最大隻个蟬仔：圓身著等一身烏色个西裝盡亮線。大聲唱等佢兜个戀歌：「瞻³——瞻瞻瞻！瞻——瞻瞻瞻！」佢兜全部背等一臺天生个放送頭⁴，該聲骸放送到當遠个人都聽得著。佢心情好个時節，就阿腦佢兜唱歌仔真好聽；心情毋好，又試著佢兜吵耳塞窟！毋過，一想著佢兜來到這世界，就淨短短幾日仔定定，就當佩服佢兜恁勇敢、恁煞猛打拚，來完成唯

¹ 揸揸揸兒：音 iam iam iam iː；此指草蟬的叫聲。

² 媠牯蟬：音 maˋ guˋ samˋ；此指臺灣熊蟬。

³ 瞻：音 sam；此指臺灣熊蟬的鳴叫聲。

⁴ 放送頭：音 fong sung teuˋ；本指廣播電臺的放送亭、廣播站，後多指擴音器。

一愛做个聲事⁵——傳宗接代个精神。該，佢就無麼个好怨嘆，乜原諒佢兜个嘶骸另命咧！

在這鬧熱个時節，佢兜一張凳仔恬恬坐在竹蔗脣詳細聽，還會發現佢兜毋係儘採唱个哦！佢兜曉得照順序、有條理，成時獨唱、成時合唱，就像係有人指揮樣仔。佢兜个歌聲有時高亮、有時低吟，成下仔大聲、成下仔細聲；佢兜个音色乜無共樣，有个較尖、有个較溫柔。其實，蟬仔有當多種，佢兜一年、三年、五年、十三年、十七年，長年都歇在暗暗个泥竇肚。佢兜困在烏泥肚，培養破土个熱情，在多年个等待過後，化地底能量做聲量，衝破重圍，就為著這短短幾日仔个自由高唱。

佢心肝緊想：這墩竹蔗仔無掖肥，敢係因為聽了蟬仔熱情嘹亮个歌聲，正會緊生緊高緊榮？該 兜人，乜愛像蟬仔恁知足，知恩圖報，逐日天轉笠媠花，這一生人就多姿多彩哩！

⁵ 聲事：音 sangˋ se；此指工作。

113年吉安鄉語文競賽客家語朗讀文章國中學生組（四縣腔）

編號2號

【線上學習】李秉璋原作

神奇、神奇、真神奇，上課毋使鬥緊，交通毋會塞，想愛學麼个，就學麼个。先生在恁擇，時間在恁選，三更半夜乜做得，先生講到生趣又分明。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使納學費，你想愛學，佢就會教。

毋管你係即靈抑係惹霸，佢都收。佢無擇學生仔、無擇時間、無擇所在，單單擇你，擇你想愛學个心。這係學習个革命，這係時代个轉變。來了急、來了遽，跔得著大進步，就像係脣頭有仙人指點，武功大進。

馬桶毋曉整有人教，鏈鋸毋曉使，一步一步來，倒訣¹分你知。網路線个接頭線路毋曉排，有人教你色地愛分明，五花十色照順序，工具合特別，頭尾一下同佢夾落去，接頭插落網路通。

雖然講一個銀角仔毋會響，毋過先生大部分都係自家在該唱戲，講到口涎波潑，精神飽滿，歡頭喜面，若人个都毋會瘡又合有耐心！一遍教毋會，過教一遍，你想愛學幾多擺就學幾多擺，學到你自家無愛。

千里緣分一線牽，天下盡在恁彈指間。現代生活真鬆爽，冷氣吹，彈指間，毋使出門、毋使尖車，想愛仰仔學就仰仔學。就算係疫情時節，學校个線上教學，有一息仔無恁自由，毋過乜有人當認真，煞猛聽課，煞猛查資料，正經係一踢三通，師傅渡入門，修行在個人。上課講義自家留，毋使抄，三個快速鍵一撇，滑鼠一箍，講義就留下來。

上課當日先生有錄影：驚你單單係「用手機仔上課定定」，人毋知走哪位去。故所，先生上課會問問題，一半問，一半係在該點名，看你心思有在無？認真上課个，回答無問題、講頭就知尾，無用心个乜無問題，平平無問題，這個係毋知半項，故所「無問題」。連先生喊佢回答，佢乜像係人間消失，無鏡頭、也無應聲，訊息欄項乜無留字，故所佢正經係「用手機仔上課定定」。

線上學習，成就隨在人，逐儕有擇个自由，就愛對自家个人生負責。對自家未來正經个慷慨，就係同一切都貢獻分現時。今晡日个恁，成就天光日个恁。

¹倒訣：音 do` gied`；傾囊相授。

113年吉安鄉語文競賽客家語朗讀文章國中學生組（四縣腔）

編號3號

【火燒坳崗¹】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時，會看著該一臺一臺個消防車駛出車庫停在路脣，雖然看毋著無閒泊杈個身影，乜聽毋著緊張刺耳個警報聲，毋過，空氣裡背因等息把仔愛停動個電波，一種神經擱纏個氣氛。

舊曆二月係美濃人掛紙個時節，恁多年天時改常²，春雨慢到，二月個坳崗燥絲絲仔，故所，第一個拜六掛紙個臨暗開始，就會看著坳崗頂出現沖天個煙，接下來紅紅個火光就透出來吔：阿姆哀唷，火燒坳崗哩！消防車個身影像走相逐樣仔春一路出，警報聲在街路頂颼等過³，一臺、兩臺、三臺……總概都出動哩，毋過，斷烏過後就難耐吔，高不將換手腳流掠個阿兵哥，拿等鑷仔、刀嫲同附近個竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機個聲就在天頂來來去去響無停。「直升機去美濃湖舀水哩啲！」美濃湖黏時鬧熱起來，大家煞煞號隻好位仔，坐下來定定仔看等直升機在湖面舀水個景象。遠遠飛過來個直升機，會到美濃湖個時節，

就會定定仔降下來，等到肚屎下背個大袋仔揆著水面，佢就會遽遽同袋仔向前拖一下再擲起來，淦淦一大袋個水就吊起來吔，續等就同這恁大袋個水晃晃激激⁴吊到廣善堂背個坳崗頂，對半天高倒啊下。恁大袋個水，隨化做一陣白白個濛煙散淨淨。

天頂個直升機一轉又一轉、對打早飛到斷烏；山腳下消防車個水一管又一管緊洩；坳崗該紅紅個火跡對山前遶到山背、對山坪遶到山頂。恬靜個暗夜，總會聽著竹頭燒到劈里啪啦⁵響個聲，火屎就跔等風一哪仔飛，等到天光該下，人家個屋頂、大路頂、田坵肚跌到全全係烏烏個火燻煤。坳崗個火日夜燒等，山下個消防車、救護車、阿兵哥乜日夜掌等……。下把仔，伸著沖天個白煙，大家想愛轉擺⁶一下個時節，紅紅個火尾又好恬恬個躡啊出⁷，就恁仔一直愛燒到掛紙結束。

火燒坳崗對環境、對山林個破壞十分大，看著劈竹頭個阿兵哥分樹杈仔剛⁸到手同面都血流血著，實在分人已毋盼得！掛紙個方式，係毋係需要鄉親好好來思考、參詳呢？

¹ 坳崗：音 in gong'；小山崗。

² 改常：音 goi' song'；反常。

³ 颼等過：音 xiu den' go；行動迅速如風而過。

⁴ 晃晃激激：音 gong' gong' gieb gieb；因搖晃使得水從容器中溢出來。

⁵ 劈里啪啦：音 pi li pa la；擬聲詞。形容爆裂、拍打等的連續聲音。

⁶ 轉擺：音 zon' bai'；休息。

⁷ 躡啊出：音 liung' a cud'；鑽出來。

⁸ 剛：音 gua'；被尖銳的東西劃破。

113年吉安鄉語文競賽客家語朗讀文章國中學生組（四縣腔）

編號4號

【鷓鴣飛啊飛】張瑞玲原作

打早，日頭正對東片鷓鴣嘴¹個後背跣起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到地，算當早咧！無胚著，正踏入園肚，隔壁種大梨个阿權哥就在該大聲喊咧：「噯！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鷓鴣得地啦！」

吾个山園在山龍圍等个窩壠肚，若係堵著像今晡日恁樣个好天時，打早就會有三、四隻大鷓鴣，在四圍个山嶺頂飛啊飛欸。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來地！阿權哥看著鷓鴣出來，做等个山事也無心做咧，跔等一陣來搨接梨仔个工人，坐在吾工寮个蔭影²下欣賞這齣大自然个表演。

看佢兜閉開長長个翼胛、跔等氣流，慢慢仔、定定仔盤，越汀越高、緊盤緊遠，到尾變做天邊个一粒烏點，就像係優雅个

天頂王者，對天頂看等佢守護个土地。

成半下，還會看著佢兜胸挺挺、目盯仔停在脣項个樹極頂高，好恬恬無聲無說就從往下³，一矚目又轉身飛往上，該尖尖利利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚地。

又成時，看佢兜在高高个天頂盤來飛去，忽然間，厥兩片翼胛一收，對天頂直直跔⁴往下，吾心肝肚還想等：「這隻鷓鴣，這下穩死無命哩！」毋過，看佢硬硬都會撞著地泥地，厥翼胛一閉、利爪一伸，一矚目時間，該利爪項，毋知哪時又抓著一隻圓身還在該扭啊扭个大老鼠地。佢一轉身，又飛到半天高咧！

歸陣人看鷓鴣表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鷓鴣守護這搭土地，戴在這四角圍个老嫩大細正有好安生生活啊！」

¹ 鷓鴣嘴：音 ieu poˊ zuiˊ；東勢東方山峰名，華語稱鷓鴣嘴山。

² 蔭影：音 im iangˊ；陰影。

³ 從往下：音 jiongˊ gongˊ haˊ；往下俯衝。

⁴ 跔：音 zud；觸擊、衝撞。